



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Anett Kontaveit Wimbledon sülen asaya nungi anentsü

Ukraine nung prangbong hadir yanglutsü atema sensaksemdar: Minister



VOL. XX NO. 248 (ADOK 248) DIMAPUR RASEMNÜ (WEDNESDAY)

AAMI (JUNE) 21, 2023

₹ 5.00

NBSE-i Anti-Bullying and Ragging Committee tentetsü tuyur

Dimapur, June 20, 2023

(TYO): Nagaland Board of School Education (NBSE)-i school ajak nung Anti-Bullying and Ragging Committee tentetsü aser Zero-Tolerance policy tenzüksü tetuyuba agütsüogo.

School aser hostel tem nung bullying aser ragging khuret azüoktsü atema NBSE-i school tekolakpur ajak nem tetuyuba agütsü.

School kar nung bullying asüba ajanga kaketshirtemi school melenba osangtem angazükba sülen NBSE-i June 20, 2023 nü iba osang metetdaksü.

"Kaketshir tain/tanur dak ragging/bullying asübaji

magizüker aser iba ya meimchir temeten anema lir. School-i aoba tanurtem dak bullying asüba atema tebilemtsü abener aser iba ajanga kaketshirtem timtemer" ta NBSE-i ashi.

School nung kaketshirtemi tayongzükbatem ajurudang yaritsü aser nungittsü atema school counsellor nungdaka kümogo, ta NBSE-isa metetdaksü.

Tanurtem dak bullying asüba ajanga tekolok, taküm aser tazungba nung timtem ajurur ta United Nations Educational, Scientific and Cultural Organization (UNESCO)-i metetdakja lir ta parnokisa ashi.

ANTA office raksatsürtem bushidar: Police

Dimapur, June 20, 2023 (TYO):

June 17, 2023 nü All Nagaland Taxi Association (ANTA) indang office raksatsüba ken o dak sendakba nung nisung ka puogo ta Kohima Police-i metetdaksü.

Iba atema North PS, Kohima nung FIR benoka lir aser police-i bushisingdang tenzükba aodang temulung melemba nisung ka pua lir, ta Kohima Police PRO-i ashi.

"Police-i bushisingdang tenzük dang nisung kar ANTA office-i aru aser parnok rongnung nisung kati General Secretary indang office-i ia prangpong agi tui ter merenshiba angazük" ta PRO-i ashi.

Iba mapang nisungtem jagi Digital Video Recorder (DVR) ta ser memory device bener ao aser

iba nung ya ANTA Office nung enoka aliba CCTVs indang data bendener. Police-i nisungtem dang nungi osang agitepa aser technical data amshia aibelenertem aputsü merangdar ta Kohima Police-isa ashi.

Iba mapa inyakertem pua arutettsüsa kuli agütsürtem nem Rs. 25,000 senpet agütsütsü. Ano, ANTA Office nungi Digital Video Recorder (DVR) bener aoba ngutettsüsa osang agütsür nem Rs. 10,000 senpet agütsütsü aser osang agütsür tenüng miimbanga ayutsü, ta Kohima Police-isa metetdaksü.

Kohima police den osang lemsatepnürtemi SDPO (North) - 7005986005 aser North Police Station - 7005986018 ajanga tongteprateptsü akok.

Apprenticeship ajanga temelenshi bener arutsü: Moatoshi

Dimapur, June 20, 2023 (TYO):

Nagaland-i industrial development, manufacturing units, production nung tangar memenep aser lanuputu atema mapa madoktsür ta Labour, Employment & Skill Development and Excise, Advisor Moatoshi Longkumer-i ashi.

Mongulbarnü Capital Convention Centre, Kohima nung Workshop on Apprenticeship nung pai iba olen jembu.

"Apprenticeship ajanga industries aser economies tarutsü melenshitsu kechiyong iba ajanga nisungtemi balaka angazük aser tashirtem tali arangshir" ta Advisor Moatoshi-i ashi.

Iba sentong nung Regional

Director RDSDE, NE States S. Mathivanan-i The Apprentices Act 1961 dak sendakba National Apprenticeship Scheme indang osang metetdaksü.

"Nagaland-i apprenticeship nung temulung agütsüba ajanga lanurtem dak sempet alibatam kaktettsü, rongsenketzüng aintsü aser state indang tarutsü jenjang yanglutsü" ta CII (Nagaland State Council) Chairperson Hokuli-ia ashi.

Iba sentong ya Ministry of Skill Development and Entrepreneurship, Government of India ajanga ketdangsüa Directorate of Regional RDSDE, NE States-i ayongzüka agir.

KG Kenye-i Union Minister tem den ajurutep

Kohima, June 20, 2023 (TYO):

Mongulbarnü Power and Parliamentary Affairs Minister KG Kenye-i Union Minister of Power R K Singh den Nagaland nung power tia indang lemsatep.

Iba senden nung Nagaland nung power maparen tajungba küm dajka linük den jenjang kasa akümsü atema Union Minister-i yaritsü nangzük.

Minister Kenye-i Union

Minister R K Singh dang pai süoki ia agizükba aser yaritsü nangzükba atema pelaba metetdaksü.

Yashi Kenye-isa New Delhi nung Union Minister of Law and Justice, Arjun Ram Meghwal den ajurutepa liasü.

Iba mapang pai Meghwal den Arrla 371(A) aser Nagaland state nung iba arrla inyaksangshiba indang osangtem lemsatep.

Taküm academic session nungi NIMSR tenzükba aotsü: CM Rio



June 20, 2023 nü Nagaland Chief Minister Neiphiu Rio-i Nagaland Institute of Medical Science and Research (NIMSR) semdang dang agiba noksa ka angur.

Kohima, June 20, 2023

(TYO): 2023-24 academic session nungi Nagaland nung mezüngbuba medical college indang class tenzükba agütsü ta Nagaland Chief Minister Neiphiu Rio-i ashi.

CM Rio-i Nagaland Institute of Medical Science and Research (NIMSR) semdangba mapang osangbener den jembidang Nagaland nung mezüngbuba medical college kanga junga yangluba atema pelaba metetdaksü.

"Mapa kanga kara inyakdar aser taküm budget nungi senotsü nungdakba agütsütsü" ta pai nangzük.

Medical department-i urban housing facility amshitsu aser ibaji medical college nung staff aser kaketshirtem lidaktsütsü, ta CM Rio-isa ashi.

NIMSR ketdangpurtem aser Health & Family Welfare department ajanga academic session metenzük dang tamasa reprangshimtsü, ta paisa shisem.

"Phriebagei, P. Khel, Kohima nung Nagaland Institute of Medical Science and Research (NIMSR) semdangogo. Maparen kanga junga inyaka aoba angudang pelar. Nagaland state nung sensotem iba reju

ajanga ajanzüksü imlar" ta Rio-i metetdaksü.

"April 24 nü Nagaland nung mezüngbuba medical college-i taküm academic session nungi tenzükba aotsü atema letter of permission nguogo" ta Commissioner & Secretary Y. Kikheto Sema-i CM Rio dang ashi.

Tanga medical colleges nung Naga kaketshirtem atema lemezüksüba MBBS seats 80 agienogo aser taküm July-August nungi medical college lapoktsüla, ta paisa ashi.

2014 küm India sorkari Nagaland nung Rs 189 crore endoka medical college lapoktsü mulunga agizükba liasü. Iba ya

Centre aser state sorkartem tsüngda 90:10 funding pattern nung inyaktsü lemtet saka senotsü shitak manguba ajanga maparen meinyaktet, ta Kikheto Sema-isa metetdaksü.

Manipur nung mepetmesü adoka aliba atema osangbenertemi asüngdang "ni kanga tebilemtsü abener saka kidanger state asü nung ni tebang meinür mesüra olen mashii mejembünür" ta Chief Minister Rio-i langzü.

"Manipur nung ozüng alema inyaksangshiba atema temulung

raksar. Nisung taküm laluba, kiojen aser tamangba yimsü dak sendakba tesemtem raksatsüba anentsüla. Ni Manipur state nung alir ozü adianutem dang yimjung nung alitsü mepishir" ta CM Rio-i ashi.

Nagaland nungo oa Imphal nung azüngba medical kaketshirtem mepetmesü adokba ajanga meyipa arua lir aser parnok atema osangbenertemi asüngdang "parnok Imphal-i oa tatidang agütsütsü mesüra tanga lenmang kar atema Chief Secretary jenjang nung Health and Family Welfare department den jembio" ta pai langzü.

Tensa kanga majung lir saka azüokteta lir anungji parnok meyipa aotsü imlar, ta Rio-isa shisem.

Kaketshir 2-3 ka dak alaka medical students teimbaka tatidang agütsütsü atema Imphal-i ogo. Nagaland state-i mepishiba ama tatidang anogo melenshiogo, ta state health department ketdangsürtemia ashi.

Tanü Health Minister P Paiwang Konyak, Chief Secretary J Alam, Home Commissioner Abhijit Sinha aser tangartemi Chief Minister Rio meina senzü.

Imphal West nung Naga nunger ki ka rongdoktsü

Imphal, June 20, 2023

(Agencies): Manipur nung Kuki aser Meitei nunger tsüngda mepetmesü adokba raraba mapang ka nung Naga nunger dak-a mapa tamajung inyakba osang angazük.

Imphal West District kübok Leimakhong Chingmang nung mejangjatetba nisung kari Naga nunger ki ka rongdoktsü. iba atema Liangmei Naga Council, Eastern Zone-i khukhua aitsüogo.

June 19, 2023 nü Manipur Press Club nung osangbener senden ka nung jembidang

Liangmei Naga Council, Eastern Zone züngsem Disubou Wijnamai-i iba tatalokba osang lemsatep.

United Naga Council (UNC)-i tuyuba ama iba mepetmesü nung Manipur nung Naga nungeri tiyongtsü nung dang jembia aser inyaksangshia arur. Ajisüaka Kuki telungpurtem ta temulung melemba bilemertemi Liangmei Naga nunger ki ka rongdoktsü, ta Wijnamai-i ashi.

Leimakhong Chingmang nung aliba Liangmei nunger ki ajak nung lendong majurutsü atema kin tenüng zülua lir. Iba

tesem nung Meitei, Kuki aser Liangmei nunger temeyoktep alir. Yasüng ki pungu shi ka nung mi senoktsü aser ki kabo Liangmei Naga nunger indang aser tanüngbaji Meitei nunger indang liasü. Iba tatalokba nung Kuki nunger ki dak mekongshi aser iba jagi Kuki nunger telungpurtem dak temulung malemer, ta Wijnamai-isa ashi.

Iba amala mi senoktsüba inyakyim anentsü mepishir aser state o centre sorkartemi Manipur tensa atema süoki ia mebilemba atema ratar, ta paisa shisem.

Telungjem ajanga terenlok bener arudaktsür: Zhaleo Rio



Khughovi yim dak Chathe ayong temdangba apu June 20, 2023 nü Advisor, Urban Development & Municipal Affairs Department, Nagaland, Zhaleo Rio, IAS (Retd.) ajanga semzüksüdang tangokba noksa ka yangi angur.

Dimapur, Aami/June 20 (TYO): Khughovi yim dak Chathe ayong temdangba Bailey apu June 20, 2023 nü Advisor, Urban Development & Municipal Affairs Department, Nagaland, Zhaleo Rio IAS (Retd.) ajanga semzükja liasü.

Iba apu yangluba indang tongmelang agi rasaa ashidang Er. Z. Inahoto Sema, EE, PWD (R&B) Dimapur ajanga ashiba agi, apu ya Advisor Zhaleo Rio teyari nung Additional funds kübok yanglu.

Senotsü peria maliba ajanga department-i apu tejenba raksar bener arua tang aliba tesem nung apu ya yanglu, ta pai ashi.

Zhaleo Rio-i iba apu semzüksüdang, Khughovi yim dak alirtem, lenirtem, department ketdangsur aser staff tem aser Chief Minister Neiphiu Rio lenisüba kübok sorkar dang pelaba lemsatepa liasü.

Taoba küm iba apu yanglu tenzükba mapang technical tsütsü timtem ajurua menur tenzükaka ita pezü tsungta iba apu renem, ta pai ashi.

"Iba 'secondhand' apu tasenba ya nüburtemi kanga junga anepalua amshitsüla. Gari tulu nokdangtsü asoshi talang nungi ajitetsüsa maitsü yutsütsüla aser metre 150 talang apu nung gari tem mapang ka nung aika mejajatsüla," ta pai ashi.

Kuhuboto Ghakhu Public Organisation tir H. Khekiye Yeptho-i asüngdangba langzüdang, SDO Kuhuboto ya ADC jenjangi upgrade asütsü nungdakba angateta lir aser iba maparen tang teinyakdak lir, ta Rio-i metetdaksü.

Nüburtemi Kuhuboto Town Council amenokner, anungji nüburtemi tim ketdangsur nem tezüluba tajung aser tejangja agütsütsüla, ta pai ashi.

Chümoukedima, Niuland aser Dimapur asoshi ni kanga bilemstür, aser terenlok mapa aika tang teinyakdak lir aser kar ano metenzük aser kar tenzüksü mapang lir, ta Rio-i ashi.

Pai nüburtem dang ka kuma lungjemtsü ashi aser telungjem agi terenlok bener arutsür saka

'ism' ajanga lokti nung telemsa adoker aser tesama ajurur, ta ashi.

Iba sentong nung Hojei Swu, Khughovi Village aser Khekiye Yeptho, tir, KGPO nung temi jembidang kanga kera terenlok aliba indang athishia jembi aser senzüka yuja aliba tesemtem nung Advisor Rio-i temolung agütsüba atema pelaba lemsatepa liasü.

Iba apu semzükba ya Khughovi yimtsung atema kisung masü saka Kuhuboto sub-division aser Niuland district atema tongtipang lir, kechiaser iba apu yagi Dimapur den sendakteper, ta lenir kati ashi.

Iba sentong nung Er. Muzivoyi Ringa, SDO, PWD (R&B), Dimapur menden liasü aser Rev. G. Iviho Chishi, Pastor, KBC ajanga apu meshiteta sarasadem.

Maneni Thungbemo Patton, SDO (C), Kuhuboto ajanga melepzüng o jembi aser Kavitolu Swu, Women Pastor, KBC ajanga sentong tembanga sarasadema liasü.

Assam Rifles temi temesepba mozü indang awareness lecture agütsü



Dimapur, Aami/June 20 (TYO): IGAR (N) kübok Assam Rifles, Dimapur Battalion ajanga International Day Against Drug Abuse and Illegal Trafficking ajungkettsütsü nükjidong nung June 20, 2023 nü Daeshin Academy, Diphupar-B nung azünger atema lecture- cum-interactive session ka agia liasü.

Temesepba mozü ajanga timtem agütsüba aser mozü nokdangtsü asoshi lenmang tem

kaketshir nem awareness agütsütsü nükjidong nung iba sentong ya ayongzükka liasü.

Iba lecture sentong nung temesepba mozü achi-ajemba ajanga lanurtem tarutsü tia raksatsüba indang jembia liasü.

Kaketshirtem temesepba mozü amshiba nungi pila lidaktsütsü mechi temesepba mozü ajanga tekolok raksatsüba indang jembia liasü.

Iba den külemi market nung temesepba mozü balala anguba

nungi jenbua alitsü atema ashi.

International Day Against Drug Abuse anogomung amuntsü asoshi hopta ka lecture/rally agütsü.

Iba sentong nung kaketshir 180 aser tesayur trok dena liasü aser süngo jema sentong tembanga liasü.

Assam Rifles temi mapa tajung inyaka kaketshir nem awareness agütsüba atema school tesayur temi pelaba lemsatepa liasü.

Mejangjaba nisung tasü mang ka nguteta lir

Dimapur, Aami/June 20 (TYO): Mejangjaba nisung (non-local tebur arishi küm 40-45 tsungta) tasü mang ka DMR-RXR tsungta railway track telung nung KM 258/6 nung laoa aliba June 18, 2023 nü nguteta liasü. Iba nisung ya train agi tsükset südi ta temolung melemi lir.

Ozüng agi melaba maparen ajak inyakba sülen tasü mang ya PM examination/jangjatetsü

atema District Hospital Dimapur Morgue nung yua lir.

Nisungba ya long pant sentüsü tanak, tula sentüsü tanak aser t-shirt temesung rapurasa semer liasü.

Kibur/kinunger/tembar temi Officer-in-Charge, GRPS Dimapur den mobile number 7085055021 nung

tongteprateptsü akok, ta Dimapur Police sangdong ka ajanga ashi.

Mkg. Police-i Brown Sugar/Heroin bena alir 5 apu



Mokokchung, Aami/June 20 (TYO): Mokokchung Police-i June 19 nü IOC Sungkomen nung garitem mita reprangbaa mapang ka nung Longmisa nung Imotondang, Mongsenyimti nung Impojong, Mokokchung nung Akumsashi, Süngratsü nung Moazulu aser Mongsenyimti nung Moakumzuk par

pungo(5) ket nung Brown Sugar/Heroin bena alir 5 apu.

Iba maparen dak sentakba nung bushitsüdagtsü asoshi Mokokchung Police-i case ka Mokokchung Police Station-1 nung Mkg.PS-1 C/No.010/23 U/S 21(b)/27 NDPS Act R/W 34 IPC nung zülüokdaktsüogo ta Additional Superintendent of Police & PRO Mokokchung-i sangdong ka nung metetdaksü.

Department of Industries ajanga NPOP awareness sentong ayongzük

Dimapur, Aami/June 20 (TYO): Nagaland nungi mersü (chilies) aser ninang-mojitzü (honey) indang organic certification atema National Programme for Organic Production (NPOP) awareness drive ka Department of Industries, Government of Nagaland ajanga Invest India (One District One Product - Districts as Exports Hub) team aser Department for Promotion of Industry and Internal Trade DPIIT, Ministry of Commerce and Industry den lungjemer Hotel Vivor, Kohima nung June 20, 2023 nü ayongzükka liasü.

ama agizükka lir. Iba yongji India nung aliba accredited certification bodies temi kuli agütsüba Indian organic products tem linük balalai alir.

One District One Product (ODOP) ya nükla tajung aliba sentong ka lir, koba Ato Kilonser Narendra Modi indang India nung district ajak amshia terenlok adokdaktsütsü nükla aliba den lirumedema lir.

ODOP nükjidong ya district shia nungi product temeja ka-ka jangjateta temaba jenjangi ajungketa ayak temeja ka adokdaktsür. Item teshimtet products tem nung rangloker ODOP ajanga socio-economic aintsü aser market accessibility tajungba kumdaktsür.

Linük nung aliba district 761 nungi product 1000 dak tema shimtetogo. Item products ya state sorkari district administration den shisa agitepa shimer.

ODOP sentong kübok ola-angla, alu nungi züsentepta, processed goods, pharmaceuticals aser industrial osset densema products tabu balala awajemer.

Linük tesem ajungalen nungi osettsüset tabu balala ajungkettsü nükjidong nung iba maparen ya tenzük. ODOP ajanga supply chain, market nung tetsükdaktsü jangjateta bentettsü aser osettsüset yanglur bendanga agütsür yarir aser district tem shimteta aliba product atema tejangja market hubs kumdaktsütsü nükjidong lir.

Anungji ODOP ajanga district tem nem tashi agütsür, entrepreneurship ajungkettsü aser linük rongsenketzung ainba aser yimchiyimjung nung yarir.

Mozü mamshi farm balala inyaker süaka parnoki züsentepta atema nungdakba certification maliba aluyimer nem training aser certification agütsütsü nükjidong nung iba workshop ya ayongzükka liasü.

Iba awareness drive ajanga mersü aser ninang-mojitzü danga leni yokba timba akumtsü kechiaser organic certified products atema international market sadema lir. Linük tesem balala nung iba amala workshop ya aika ayongzüksü sentong lir.

Ministry of Commerce & Industry, Government of India kübok National Programme for Organic Production (NPOP) ya accreditation of Certification Bodies nung dena lir, aser mozü mamshi alu ayimba aser marketing temaba jenjangi ajungkettsür.

Unprocessed plant products tem atema European Commission aser Switzerland ajanga NPOP standards for production and accreditation ya par linük nung adokba den sako



International Day of Yoga amongtsü anogo ka jelia June 20, 2023 nü Major Dhyana Chand National Stadium, New Delhi nung Youth Affairs Secretary, Meeta R Lochan leniba nung tangartemi Yoga exercise agiba noksa nung angur.

Centre nungi team kati UP aser Bihar na semdangtsü

New Delhi, Aami/June 20 (Agencies): India tesem aika nung tali atsükba agi nisung aika südar; iba tensa asadangtsü atema Mongolbarnü Union health minister, Mansukh Mandaviya-i senden ka ayongzuka amen aser züngsem pongui akümba team ka tentetogo.

Team nung züngsemtemji health ministry aser India Meteorological Department (IMD) nungi ketdangsertem lir. Parnoki tali atsükba agi nisung teimba asüba state tem semdangtsü.

Mongolbarnü Union health minister Mandaviya leniba nung senden ka mena linük tesem balala nung tali atsükba agi asüba nokdangtsü aser awareness asütsüsü atema o lemtepogo.

Iba senden nung adenertemji Niti Aayog züngsem (Health),

Dr V K Paul, Indian Council of Medical Research (ICMR) Director General, Dr Rajiv Bahl aser India Meteorological Department (IMD) nungi mongintem liasü.

Mandaviya-i, Indian Council of Medical Research (ICMR) dang tali atsükba agi nisung asüba nokdangtsü atema teinyaktsü balala benokang ta tuyuogo, ta metetdaksü.

Tesüiba hopta ka tsüngda Uttar Pradesh, Bihar aser Odisha densema linük tesem balala nung tali atsükba agi niusng aika asüba osang lir.

Tawa anogo ishika Uttar Pradesh aser Bihar na nung tali atsükba agi nisung 96 tashi süogo. Bihar yimtiba, Patna nung tali atsükba agi shiranger 200 dak tema hospital nung mongdar aser Uttar Pradesh kübok Ballia nunga tali atsükba

agi shiranger 300 shi hospital nung mongdar.

Odisha nunga tali atsükba agi nisung ka asüba jangjaogo, ta state sorkari metetdaksü, ajisüaka state tesem balala nung tali atsükba agi nisung 20 dak tema asüba osang lir, ta Special Relief Commissioner's (SRC) office ajanga metetdaksü.

India Meteorological Department (IMD)-i, Uttar Pradesh aser Bihar densema linük tesem aika nung tali tatsük kümogo aser maneni taruba anogo asem shi tatsük asütsüsü, ta metetdakja lir.

PM Modi-i US semdangtsü apusoa ogo

New Delhi, June 20 (Agencies): Tang mezüng Ato kilonser, Narendra Modi-i official süa US semdangtsü atema New Delhi nungi apusoa ogo.

Pa Washington tonga aodang Indian-Americans telok kati pa agizüktsü, ajisüaka ano meimchir temeden atema inyakertem telok kati India nung temeden balala anema inyakba nung ajemdaker Modi-i US semdangba anema longkak aittsü renemogo, ta osang angazüker.

Journalist aser meimchir temeden atema inyaker, Pieter Friedrich-i Twitter ajanga, noksa ka lemsatop, aser pa densema tangokba noksa nungji Modi ya "Anüdoklen adokba Hitler lir" ta zülua lir.

June 22 nü Modi-i Tir Biden ajurudang Indian American Muslim Council, Peace Action, Veterans for Peace aser Bethesda African Cemetery Coalition longjemer White House anasa longkak aittsü sentong renemogo. Ano külen meimchir temden atema inyakba telok ana- Amnesty International aser Human Rights Watch-ia Washington nung BBC documentary, 'India: The Modi Question' sayatsü.

Modi-i June 25 tashi nung United States aser Egypt na semdangtsü. Modi-i mezüng New York semdangtsü aser June 21 nü United Nations headquarters nung pa leniba nung International Day of Yoga amongtsü.

Iba sülen Ato kilonser Washington DC-i aotsü aser June 22 nü White House nung Tir Biden den senden amentsü aser kasa anogo nungsa pai US Congress nunga jembitsü.

Official nüngdak balala dak alia Ato kilonseri CEOs, professionals aser stakeholders ajurutsü aser yangji alir India nungertem ajurutsü, ta MEA-i metetdaksü.

June 24-25 anogotem nung Modi-i Cairo yimtii apusoa oa Egypt semdangtsü.

Modi-i Egypt Tir, Abdel Fattah El-Sisi den senden amenba dak alia pai Egypt sorkar tongti ketdangsertem, nüngtugu nisungtem aser Egypt nung alir India nunger ajurua jembitsü.



DIMAPUR BRANCH
Nyamo Lotha Road (Church Road)
Dimapur- 797112, Nagaland, Email: dimapu@bankofbaroda.com

KIOJEN AYOKTSÜ ATEMA NOTICE

APPENDIX- IV-A [See proviso to Rule 6 (2) & 8 (6)]

Securitisation & Reconstruction of Financial Assets and Enforcement of Security Interest Act, 2002 den külemi Security Interest (Enforcement) Rules, 2002 indang proviso to Rule 6 (2) & 8 (6) kübok Kiojen ayoktsü atema E-Auction Sale Notice. Public aser talisa sen apur (tem) aser Guarantor (tem) dang, Secured Creditor, **Bank of Baroda, Dimapur Branch, Dimapur, Nagaland** den mortgage asüba tsünglanglen shia aliba kiojen Authorised Officer of **Bank of Baroda, Dimapur Branch, Dimapur, Nagaland**, Secured Creditor-i tsünglanglen shia aliba sen alangzüktsü atema "kiojen aliba tesem", "yangji aliba ama" aser "yangji aliba ajak" ayoktsü sangdonger.

Sen apur/tem/ Guarantor/tem / kiojen/tem sentsüh / Reserve Price / e-Auction anogo & mapang, EMD aser Bid ajungketba sen osang tejangja tsüngnglen agütsür:-

Agidokba jenjang: Physical

Kiojen rebrandngba anogo aser mapang: 03.07.2023 & anepdang 10:30 ako nungi nikongdang 4:00 ako tashi

Sentsüh ajak senteper: 22.12.2021 anogo tashi nung Rs.1,20,74,427.74 (Rupees One Crore Twenty Lakhs Seventy Four Thousand Four Hundred Twenty Seven and Paise Seventy Four Only) aser iba denji külemi sen tetemlok aser tanga charges.

Sl. No.	Name & address of Borrower/s / Gurantor	Kiojen aser osang tejangja	Date & Time of E-Auction	Reserve Price, EMD amount, Bid Increase Amount.
1	1. MR. SUBASISH DAS (BORROWER) Proprietor of M/s. New Zoom Colour Lab, T. S. Market, N L Road, Dimapur, Nagaland State- 797112. 2. MRS. SARBANI DAS (CO-BORROWER) House No.11, Sematilla Colony, Dimapur, Nagaland State- 797112.	Block No.8, Mouza No.3, Dimapur nung Shri Subasish Das, S/o Himangshu Ranjan Das tenüng nung Patta No.629, Dag No.13/730 kübok aliba ali tasazük 1B-00K-00L (14400 Sq.ft.). Bounded By:- North:- Huwato Chishi, South:- Sontosh Malakar, East:- Main Road, West:- Khehuto Kiba	06.07.2023 1:00 pm to 3:00 pm	Rs. 1,62,00,000.00 Rs. 16,20,000.00 Rs. 1,00,000.00

Kiojen ayoktsü telatetba osang tejangja atema iba link nung agüja lir- <https://www.bankofbaroda.in/e-auction.htm> and <https://ibapi.in>

Date: 21.06.2023

Place: Dimapur

Authorised Officer
Bank of Baroda, Dimapur Branch

GOVERNMENT OF NAGALAND OFFICE OF THE CHIEF ENGINEER PUBLIC HEALTH ENGINEERING DEPARTMENT NAGALAND : KOHIMA

No. NO.CE/PHE/WSSO-JJM(SA)/2019-20

Dated Kohima, the 20th June 2023

NOTIFICATION

Selected candidates for Jal Shakti Fellow

In continuation to the Department Advertisement No.CE/PHE/WSSO-JJM(SA)/2019-20dt. 9th May 2023, and as per the directive from the Ministry of Jal Shakti, DDWS, the following candidates are qualified for District level and Block Level Jal Shakti Fellow. The registration numbers of the qualified candidates are as below :

1	27	58	117	121	126	148	166	201	202
280	286	361	371	377	434	13	20	24	26
29	36	48	67	73	75	78	81	85	98
99	100	118	122	125	128	129	133	152	154
155	159	166	167	168	170	176	189	196	198
222	229	238	239	246	248	250	254	256	258
269	270	287	295	300	301	310	317	321	327
328	330	340	346	347	351	353	357	362	363
374	375	379	380	387	392	401	422	431	435

The candidates shortlisted below will be engaged as interns complying the advice of the Ministry of Jal Shakti:

3	7	15	16	21	32	39	40	50	51
53	56	57	60	61	62	63	64	66	68
70	88	92	93	101	105	109	110	116	120
127	131	144	146	149	158	160	163	175	180
187	197	210	212	226	228	259	260	266	273
275	276	278	281	282	289	307	309	313	326
329	335	343	348	360	364	368	383	384	412
413	415	430	432						

- The above qualified candidates and interns should submit their acceptance letter before 28th June 2023 to the undersigned. Engagement letters will be issued only to those submitting the acceptance letter. The letter may be submitted at Knowledge centre room, Office of the Chief Engineer, PHED Kohima.
- For any queries / assistance you may contact +918837217685 / +919862808037 during office hour.

**Chief Engineer, Sanitation & WSSO, PHED
Nagaland, Kohima.**



TIR YIMYIM YIMOBILEM (EDITORIAL)

DIMAPUR RASEMNÜ, AAMI (JUNE) 21, 2023

NPSC Question yanglur mali !

Tawa Nagaland Public Service Commission (NPSC) ajanga Nagaland state nung maparen tapu balala atema engineer-tem shimtsü asoshi tatidang agibatem agizükli tamagitsü akümtsüsa agitetbaji NPSC nung ketdangsertem asoshi dang masü saka Naga nungger ajak asoshi tamakok dang masü alima tsüngdang maksü tulu ka bentsür aruogo. Atangji, ajia Naga Students' Federation (NSF) aser Combine Technical Association of Nagaland (CTAN) telok nati mereprangtet asübo, asenok Nagaland nung alir Naga nungger jakla apibo ola madoki odang meshitak agi shitak küma odaktsür süla. Lokti tentettem dak tamakok aser tashimait aika liaka, Naga nungger tang aser tarutsü asoshi inyakba mapatem nung tang amaji meshitaki inyakba mapatem khen khen danga puteta metongshitsüba atema NSF aser CTAN ama telok dang nübortemi pelatsü tim aser parnok ama telokji tasü itdakja ajungshitsüla. Atangji, akhidang mapang kabo NPSC nung ochimashi inyakba mapatem indang kangasa jembia angashi aser ano mapang kabo mapa inyakertema pua bushisüngdangba mapanga liasü. Iba amaji NPSC tenzüker külen pei pei mapang nung pei jakla yimya aser temetetba shisatsü yari tenüngsanga aser nüngsena jembitsüsa ataloka aruogo. NPSC ya Nagaland asoshi kanga tongtibang telemtetba agidak sabang ka lir, kechiyong Nagaland atema sentong yanglutsü aser ozüng shitak amshia nübortem tenzüksü asoshi tanishir aser tulus shimer rogotemji NPSC nung züngsemtemji lir. Itemji atamata purtem masü. Parnokji tulus tem madak tulus, kechiyong parnokiang tulus tem shimer. Iba ama telok nung züngsem asütsübaji maangka dang masü saka khureta tulu lir. Aji oda, parnok dak nungi nübortemi tajung ajak imlar. Ajisüaka, tang amaji engineer-tem shimtsü atema tatidang agiba dena tamagitsü akümtsüsa 'questions' renemtetba rogotem jagibo Nagaland asoshi administrator-tem süli mesüra engineer-tem süli shitak meshimtettsü. Aji oda, NPSC ajanga shimba administrator ka dak nübortem tenzüksü sempet melira mesüra NPSC ajanga shimtetba engineer kati kilentzü yanglutsüba drawing dena meyanglutetra, Nagaland state asoshi aji alima tatembang ka atonger amai asütsü. Item ajakji NPSC ajanga tatidang junga agia shimba aser meshimba dak keta lir. Atangji, tang NPSC nung inyakertem dak tajung kaji parnoki inyakba nung tangartemi tai apu dang, tai ka agi tai ka nembangtsü memerangi, jet ta tai alibaji nangzüka metongshibaji lir. Iba jagi tang Engineertem shimtsü atema tatidang agiba nung tangari renema akaba tasüngdangbatem dang ajizüka bener arua NPSC meyong questions kümer amshiba taiji nangzüka tatidang agir aliba ajak ano agishitsüsa kümdaktsüogo. Atangji, shitakba inyakdi asübo tatidang agishitsüsa akümba den külemi inyakertema karbo peisasa mapa nungi anentsüla. Iba ama maparen tongtibang nung pei dak aketba temetetba aser shisatsü amshia meranga inyaktsü melen ayongayonga tangar kisüng dak nendaker alibaji, pei asoshiibo tajung asütsüsa akok saka iba jagi pei limabo talangka shia marutettsüsa akoksadaktsür. Tang NPSC ajanga agibajibo züngzüker mapa inyaktsü purtem shimtsü atema agiba tatidang lir saka class 12 ajanger Engineer azüngtsü asoshi agiba JEE main aser JEE Advanced tatidanga küm shia National Testing Agency ajanga agir aser iba tatidang nung kodanga tamalen JEE tatidang nung asüngdangba kasa question tilakata tanaben asüngdanga mangutsü. Tangarbo tazüngtsü purtem shimba tatidanga iba tashiji agir. Iba denji kodang asenok NPSC ajanga tatidang agitsü renemba mapa ya medemdangdir, asenokbo tatidang nung tangari asüngdangba langzütsübajibo yutsür, tangar dang asüngdangtsü asoshi tasüngdangbatema merenemtetba jenjang nung lir. Atangji, langzütsüba kisüngji masü saka nüngdak shitak repringteta asüngdangba nungiang tagitsübo shimtettsü. Aji oda, Nagaland ya state mesüka kümdi süra tamasa NPSC-i Question renem ashitsüla.

OLEMSABANG

NÜNGJA ASER TRTSÜR LIBALIRU

~ P.Renthy Jamir.

Onük dangi marudang tamasa Ao oshi aibelena jembiba ojang tongtibang kar, item ya Arok osep nunga tai rateta lir.

- i. Matamabensar- Lemtamata (disabled) telemta .
- ii. Shisangren- Shitetren, Shisangren (distinct) shisangshisanger, shitetren (identify) nai ni shisangerma ta mejembir, Nai ni shiteterma ta-ang jembir.
- iii. Shisashir - Kaketshir shisatsü (wisdom) Tsüngremi agütsüba kaketshisatsü (knowledge) temetetba nisungi bushia angazüba shisashir ta masü kaketshir (AKM) Ano pura aser kümrem ana ya O taret nung mamshir. Pura süra yazü (fiction) ochi masü saka ochi ama (moral) mulungdangtsü aketba. Tiazü jembir dang tepura ta ashir mapa tasen ka inyaktetba oset tasen ka yanglutetba dang puratet ta majar shisatet asatet shisadanga asadanga yangluba. Kümrem süra ya tetsür tanur O nübangso yabo kümrem junger ,Azüngkenshi yabo kümrem junger ta tetsür tanur O. Lokti kati yimden kati kümrem pelar ta osang kaket nung züluba ya O tetezü junga mangatetba.

Ni tamalen Tir Yimyim ,Ao Milen osang kaket nung tetsürtemi Tir ta mendenbula melena amshiba ya Aor sobaliba nüngja den khenyongi mapet ta zülü. Saka Aor tebur shingaia aji shitak tai ta ola kata madok. Aor sobaliba nung Arju Tir ya nokinketer arürleper dang agir. Arju nung arürshi aotsü sentong ajak par kidang sentepa pa tokolak sür yanglur. Arür lepseta bener arura par kidang adenshir mangkotrongi atutsü. Ken nunga Khristan arürshir Tir ola angang ta atener. Aor sobaliba nung tetsür ya jenjang temaba nung amshir. Anungji tetsür rarai modaktsür. Aotsürbo tangar kin ama masü mangana, khu bena modaktsür lenpii modaktsür. Aji dang masü Nashi kolak Ak kolak tuluba koba dang zünga kongten ta ajar iba ya tetsür nem chidaktsür. Iba ya putupur unger shi kolak danga tuluba shientsür shi kolak danga tuluba tenzüksür. Ya Aor zünger nübuyok shi achiba nung züngatsür nem leptettsüba lir .Ano tzüyoki aoba ango kolak tuluba (marba) tetsü nungi shir tetsürtem chidaktsür. Saka tetsür shinga danga Tir ta ja-a maru. Parnok dang Tennir ta Tennila ta ajar. Alu wadang ajak nung tetsür tebur kwi tendak noktakdir ten ajak tetsüri anitsü. Anungji Tir ya tebur nüngja aser Tennir ya tetsür nüngja ta amshir.

Tang tetsür libaliru onük dangi arudi, Lipok nungi alima nung tetsür tajung tetemsü soteter, tetsür meteniang yimten yimli aser kibong tabensa makümer. Saka yangi tajung ajakji nemdaka yutsür tamajung teraksa tsütsü kar ataloka aruba yashi nungi tanü tashi tetsürtemia yamaisa libalirur ta nenshia zülur. Tetsür ta ajaba nüngja ya mezüng Eden tsüki nung Adami ya kü teret aser kü shi agi yanglu anungji Tetsür ta ajatsü tasür Nüngja agütsü. Lipok 2:23 , ano Shakespeare-i , Hamlet otsü züluba nungbo tetsür nüngja ya pai yamai shia lir. Tashi mait ne tenüng Tetsür Frailty Thy name is woman matoksa meperi yakta ashiokdaktsür easily tempted to do wrong. Yakta per nem ashiokdaktsü. Junger, junger ta asüyonga langka metokmeperibosa lir ta ashir. Ano Alfred Tennysoni The princess 1847 tasür züluba nungbo Tetsüri tetsür masen Women is so hard upon woman ta zülua lir parnok O parnok na tenük kanga meremteper la ama medemer madokdaktsünür. England Chubatsüri 1580 England lima tetsür shinga Aina (mirror) nung mereprangtsü ozüng agütsü. India tsür Sushma Swaraj-i Sonia Prime Minister kümra la ku ajak sütoktsü aser Sonia Prime Minister ali tashi kuji memeidaktsütsü I will not let my hair grow ta jembiba alimai-i otsüsütsüsa jembir.

Ano tetsür dak bensatsütsü keta lir, lar tsürabur aser tebruar tsürabur khenyongi balala amshir. Aor Asürmetenla nunga tebuja dang tenü majung indang apua apua shia tebuttsü O angar tebuja tetsü taküm leper nung oa alenloka yutsüba jembir. Osü ozü shi tasür tebuja jala nem asongshi tasen tar ta sür kümsang tezü taku enoktsübaji tiazü puraba masü. Tang 18-5-2023 Faridabad (India) nung Bhagat Singhi tebuttsü sür tetsür tasen ka agi .Par tanur tetsür ka küm 5 tain tebur ka küm 4 tain tetsü sür küm anabuba. Tebui tanur anaji tzütu tarok ka nung puoktsür tetsüng agi ajemita ayu. Iba osangji angashitepa kiyonger Dharendra aser Naseemi arua agiteter. B.K.Hospital bener ao saka anaprongla tasü liasü. Iba ya tebuttsü tasenlai tanur anaji onsara meketmesüngba agi inyak ta tebui ashi .Ano tetsür tamajung aikati lar jabaso kibongtem nung amushia yimsü sütsür. Southern Italy Rome Vasto nung kibung ka nung tebuja tetsüi yimsü sütsüba tebuttsüi aremer maremzüker temaba courti ao. Balatsü jembidang lai ashi kü kinungbuji tetsü lar My husband was his mother's slave. Lai ni chiyungba tanur nem chiyungdaktsüba meshi repringer. Ni tejak nung powder tilaka nülokra (make up) ateter süoshi tasen ka sobura ashishir

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Delhi Arogoi Manipur nung tribal Khristantem yaritsü



June 16, 2023 nü New Delhi nung ayongzükba workshop nung adenerkem tangokba noksa nung angur. Delhi nung tongti putir Anil Joseph Couto (mena alirtem abelen nungi tasembuba) noksa nung angur.

New Delhi, June 20, 2023 (Agencies): Delhi nung Arogo kati Manipur nung rara ajanga kongshiba Khristantem yaritsü, ta sangdongogo.

Taküm May 3 nungi tenzüka Manipur nung Kuki nung anema raradang nisung 100 dak tema asüba den aika yiru aser nisung meyrjang aika jenshiogo.

June 16 nü Delhi nung tongti putir, Anil Joseph Couto-i, "Manipur nung pei yimsü aser maitsü ajanga timtemba ozü nüburtem yaritsüji onok teinyaktsü mapa lir. Onoki parnok den tejashi lemsateper aser Arogoi akokba tashi lenmang balala agi yaritsü telemtetba agiogo," ta metetdaksü.

June 12 nung Bangalore nung tongti putir, Peter Machado-ia Manipur nungi kaketshir 70 ajurudang Arogoi state nungi kaketshirtem yaritsü, ta sangdonga liasü.

June 16 nü Delhi nung workshop ka nung jembidang

tongti putir, Couto-i, "Tang onok atema tongtibangtiba teinyaktsüji teyari oset balala agütsütsü lir," ta metetdaksü.

"Onok Arogo nung community telok units 480 lir. Arogotem nung volunteers-i senotsü tenla den külemi chiyungtsü takong aser nungdakba oset balala bendenba sülen Manipur-i yoktsü," ta pai metetdaksü.

Paisa, Manipur-i meypa mouteti New Delhi nung alirtem nem Arogoi angati health services aser shisaliok agütsütsü, ta nangzük.

Iba workshop nungji putirtem, nun tem aser stakeholders 50 shi aden. Iba sentong nungji Auxiliary Bishop, Deepak Valerian Tauro-a aden.

Manipur nung Meitei Hindu nungertemi Scheduled Tribe (ST) jenjang akhangba anema Kuki aser tanga minorities-i longkak aitba nungi rara tenzüka liasü.

Osangbener den jembidang Delhi nung northeastern Catholic community nung züngsem, Thomas Ngaihte-i, "Manipur nungi Delhi-i jena arur Khristan 250 shi onoki anepalua yaria arudar. Onoki parnok nem chiyungtsü, tejenokdak aser medical teyari agütsüdar," ta metetdaksü.

Manipur nungi Kuki tribal Khristan, Ngaihte-isa Delhi nung Arogoi Manipur nung takoksa angurtem yaritsü nangzükba atema pelaba lemsatep.

Kuki tribal nisungtem teimbaka Khristantem lir aser Meiteis nung teimbaka Hindu nungertem lir, ajisüaka parnoka karbo Khristan lir.

May 3 nü All Tribal Students' Union Manipur-i ayongzükba longkak aيتدang rara adok, aser tang tashi nung nisung 100 dak tema asüba den külemi Tenla ki 250 aser Hindu nung tekülem ki 17 raksatsüogo mesüra rongdoktsüogo.

Madhya Pradesh nung Arogo lenirtem anema ken o benok

June 20, 2023: Madhya Pradesh state nung Khristan putir anati sorkar ketdangsertem dak teka sangshi aser official mapa inyakdang timtem agütsüogo, ta tai tonglokja police-i putir ana anema ken o benokogo.

May ita nung ketdangsertemi lajartem anepaluba orphanage ka mita aodang putirtemi timtem agütsü, ta putir ana nem tai tongloktsü aser iba dak sendakba nung June 15 nü Madhya Pradesh nung police-i Sagar Arogo nung youth director putir, E. P. Joshy aser Arogo nung putir, Naveen Brahmakulam na anema ken o benok.

Sagar district child welfare committee nung züngsem, Kleen Rai-i putirtem anema complaint agütsüba nung ajemdaker police-i putir ana anema FIR benok.

May 8 nü Shyampur nung

inspection team kati St. Francis Sevadham Orphanage anasa aliba Tenla kidang sabang bushisüngdangbaji putirtemi ashishia liasü.

Iba orphanage nung director, Sinto Varghese-i, "Sorkar mapa inyakertem official mapa inyakdang timtem agütsü, ta tai tonglokja maneni ozü putirtem anema ken o benokogo," ta metetdaksü.

June 17 nü osangbener den jembidang pai, "Ano maneni ken o tasen ka benokba ya child rights protection committee-i onok anema maneni mangyangba lir," ta metetdaksü.

"Kecha tajemdakdak makai Centre sorkar aser state nung child rights protection committee-i onoki lapokba orphanage anema inyaker," ta pai ashi.

"Joko onoki maneni tiyazü ken o ka anema raratsüsa

akümtsü," ta paisa shisem.

Iba orphanage license 2020 küm tembangba sülen Arogoi Madhya Pradesh High Court dang temepishiba shidi ka zülua liasü. Iba mapang nungjagi tenzüka mapang shia child rights protection committee-i iba orphanage mita aoer.

National Commission for Protection of Child Rights-i May 8 nü orphanage mita arubaji putirtemi kecha mashishi, ajisüaka ketdangsertemi convent, presbytery aser Tenla ki densema mita aoba, talisa Tenla kidang temeshi sabang mita repringbaji putirtemi ashishia liasü.

Varghese-i ashiba agi, ketdangsertem jagi CCTV footage aser mobile phone nung video tangokba kuli ajakji indoktsüogo.

Nütsüng million 72 aliba Mahdyia Pradesh nung nütsüng shilem 0.29 dak Khristantem lir.

ANOGO ABEN TSÜNGREM DEN

Tim Tetsüba Shisatsü ka T.Ken 112:1-10

Asenok meketa tetsüba aika lir. Saka idakji tetsüba ajak aridoktsüba tetsüba ka lir aser aji T.Ken 112 nung sayur. "Kibuba tenüng sangang. Kibuba nem tenünsang agütsüba temoatsüba, shibai Pa temelaba nung alir tepela tulu angur" (t.1).

Asenoki Kibuba tsübura, tetsüba ajak Pai anebalur. Ka ji kibong tetsüba. "Pa metsü alima nung tashi tulu alitsü; teindang putu temoatsüba" (t.2). Tanurtem Kibuba nem bendanga agüjang aser na parnok asoshi shisabulu malitsü.

Kibuba tsübura agi sen tebilemstütem aridoktsür. "Azükaru aser rongsen pa kidang alitsü; aser Pa temeshiba teti tatem maka alir" (t.3). Iba tetezü asenok ajak takar akümtsü ta masü, saka asen nungdak teti angutsü. Asenoki Kibuba tsübura, asenok sen-o-tsü tsütsü mesüra anogoshia chiyongtsü asoshi tebilemstü malitsü.

Kari ammag tsübur. "Ochishir dangi ammag nung sangwa adoker; Pa taochi aria bilemba aser temeshiba agi sünga lir" (t.4). Tsüngrem tsübuang ase ne nungdak ajak nung nai tesangwa angutsü. Pai na anitsü aser ne lemmang tuyutsü.

Kari tarutsü aser temelenshiba tsübur. "Kechiyong Pai kodanga marakzüi alitsü, ochishirbo teti tatem maka bilemteta alitsü" (t.6). Tsüngremi ashir, "Na meketa melenshia aoba mesüra ne dak temelenshiji tsübua teli. Ni alima rangpen Tsüngrem lir. Ni tsübuang, aser temelenshiji ni repringtsü."

Kari osang tamajung tsübur, saka tekong 7 nung asenoki azünger, "Pai tamajung osang tsübua malitsü; Kibuba dak amangang, Pa mulungjang akangakanga lir." Nai Tsüngremi mulungba nung jajara osang tamajung kecha mangashitsü/ malitsü.

Kodang nai Kibuba tsübudir, tanga tetsüba ajak akoker. Ne tarutsü Pa dak amanga tanü Kibuba tsübuba nung jajaang. Pai ne nem tesünep agütsütsü.

Texas nung Arogotemi Mayflower Arogo nungi züngsemtem yaritsü

June 20, 2023: Texas nung aliba Arogotemi China nung aliba Mayflower Arogo nungi jena aruba züngsem 64 yaritsü nangzükogo; Mayflower Arogo nungi züngsemtemji 2019 küm South Korea-i jena ao, ajisüaka parnok nem tejenokdak magütsüba sülen tesüsa US-i ao.

Texas nung Southern Baptist Arogotem den tanga Arogotemi 'Mayflower Church' ta ajaba Shenzhen Holy Reformed house church nungi jena arur 64 yaritsü nangzükogo.

Tanur 32 densema China nung Khristan 64 ji 2019 küm South Korea kübok Jeju asetkongi jena oa liasü. China nung Khristan kibong 16 bo Thailand nung lir.

Freedom Seekers International nung CEO, Deana Brown aser ChinaAid nungi Bob Fu nati China nung Khristantemji US nung taküm tasen asentenshidaktsütsü nükjidong nung Arogotem dang nungi teyari meshia liasü.

China nung Khristan 64 yaritsü nangzükba Arogotem rongnung First Baptist Church, Tyler's South Spring Baptist Church, Flint Baptist Church, Sylvania Church, Grace Community Church aser Rose Heights Church densema lir.

Iba Arogo nungi züngsem 64 tashi yaküm September ita nungi Thailand nung liasü aser parnok visa mapang tembangba ajanga Thailand ketdangsertemi apu. Parnok dang senchi achiba sülen pua Bangkok nung aliba facility kati anir oa liasü. Ajisüaka April ita tetenzüklen Texas-i ao.

Taküm August ita nungi tenzüka China nung Khristantem jagi United States nung jenoka alitsü meranga liasü aser tesüsa parnok tebilemba atalok.

China nungi jena aruba Khristantem yariba atema Pastor Fu-i International Religious Freedom Alliance densema International agencies aika dang pelaba lemsatepogo.

AO OSHI ANGAZÜKDAK:
TANÜ ANGAZÜKTSÜBA OJANG



Rasa

(v) sen rangben agi tanük melen (convert money into change)

* Onok lema agitsü atema shishilemdak oagi sen **rasa**.

Rasarabong

(adj) ain adokba, tejokjok ain aketba (Irritable, hostile)

* **Rasarabong** aketer nisung den medemtsü kanga tasak.

OLONG PAITEP # 6552

1					2			3
							4	
5		6			7			
8								9
							10	
				11	12			
		13						
14					15			
				16				

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6551 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

GENTLEMAN KA TIA
Gentleman ka ayaterm nung yi agi jemkanger laojia nemzüya lia police ka ajurur.

Police : Sir, na ya nür ki bushirba asü koda?
Gentleman : Hau ni ozü ki bushirba, oagi gate temesüngbaji angur südi? Aji ozü kia.
Police : Chichiba nür ki asü masüar jong, ni mindi.
Gentleman : Ya ozü gate, iba kishi ya lapok nung piano ji ngudar ma? aji kü meyong, ajisür külen upstairs yagi tanem tanemi atu nung iba kishi ya lapoktsü, iba ya tantsü küna bedroom, ji yipten tulu kaji ngudar ma? Tetsür ka mejanga alilaji kü temeim kinungtsü aser la den mejanga alisangji ni ati.

~ Lilir : WhatsApp

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NPP Iennir Pyniaid Sing Syiem-i KHADC CEM inyaktsü



Meghalaya, June 20, 2023
(Agencies): KHADC nung Chief Executive Member (CEM) inyaktsü atema Sohryngkgam nungi National People's Party (NPP) MDC Pyniaid Sing Syiem shimogo. June 20, 2023 nü Syiem den

tetokteper shinga mali takok angu aser KHADC Chairman Lamphrang Blah-i iba osang metetdaksü. Syiem ya KHADC nung taoba Chairman liasü aser NPP-i aniba Khasi Hills Democratic Front indang

Executive Committee tasen len anitsü. NPP indang MDCs 12 lir aser Congress MDCs 6-i parnok yarir. Hombarnü Chief Executive Member (CEM), Titosarwell Chyne-i aniba United Democratic Alliance (UDF) indang Executive Committee anema NPP MDC Bajop Pyngrope-i no-confidence motion ka benoka liasü. Pyngrope-i Chyne inyaksangshi anema no-confidence motion benok aser Chief Executive Member (CEM) Titos Chyne-i aniba Executive Member-i non-confidence motion nung tamakok angu. MDCs 30 nungi 17 -i 'No Confidence Motion' pusema nungita liasü.

Mizoram nung Internally Displaced Persons committee senden amen

Aizawl, June 20, 2023
(Agencies): Mongulbarnü Forensic Laboratory Conference Hall, MINECO nung Home Department Commissioner & Secretary menden ser Internally Displaced Persons (IDPs) indang Executive Committee senden ka amen. Senden nung chairman Pu H. Lalengmawia-i o jembidang Chief Minister Pu Zoramthanga-i New Delhi semdangba aser Prime Minister o Union Home Minister na dang Internally Displaced Person teyari meshiba osang lemsatep. Iba senden nung Aizawl, Kolasib aser Saitual district tem nungi Deputy Commissioner tem aser Central YMA Iennirtemi mapa

balala inyaka aruba aser refugee tem indang tebilemstütem lemsatep. Refugee atema temporary shelters yanglutsü melena sorkar ali nung kiojen yanglutsüla ta parnokisa ashi. Iba senden nung refugee tem jungjunga anepalutsü onüktem lemsatep aser Health Department kettangsurtemia refugee tem osang den shirangertem anepaluba osang lemsatep. ICDS den yaritepa refugee tanurtem nem chiyungtsü tajung agütsür ta Health Department-i ashi. Senden nungsa refugee tem nem relief funds agütsütsü mulunga agizük. MLA tem aser sorkar mapa inyakerteri refugee asoshi sen tenlatsü akok ta parnokisa jembi.

Mizoram sorkar school balala nung refugee tanur 1,500 tema admission agiogo ta School Education Department-ia ashi. Executive Committee-isa refugee registration system onük benoka lemsatep aser iba atema Home Department-i district- aser village-level committee tentetsü mapa inyakdar. Manipur kübok mepetmesü adoka aliba tesemtem nung Zonunger aser ano Mizoram nung jenoka alir nem Mizoram state sorkari tanga relief supplies den külemi jang quintal 2388.50 agütsüogo. Manipur nungi IDPs 11785 tashi Mizoram nung jenoka lir. Mizoram nung tang Manipur, Myanmar aser Bangladesh nungi jena arur nisung 50,000 tema jenoka anepalur.

Meghalaya nung Rs 15 crore alang heroin & marijuana apu



Shillong, June 20, 2023
(Agencies): Meghalaya kübok East Jaintia Hills nung Rs 15 crore jenjang drugs shibelener nisung 9 puogo. Hombarnü Nagaland nungi Tuanbiaklian Guite aser Imliakum Longkumer na apu aser tena ket nung heroin seret 2.7 bena liasü ta district SP Jagpal Dhanoa-i ashi. Ano, kasa anogo Khliehriat nung Tripura nungi miima shibelener nisung 7 apu. Parnok ket nung ganja seret 251 bena

liasü. Nagaland nungi mozü shibelener nisung ana ket nung saponng pongdang 200 bena liasü. Tanen sentsü powder ji gari nung miima bena liasü, ta SP Dhanoa-i ashi. Osang tejangja angazükba sülen district police-i Meghalaya telungi aruba garitem mita repringdang Tripura nungi aruba gari ana nung Rs 10 lakh alangba heroin seret 251 bena aliba apu. Iba dak sendakba nung

Khliehriat police station nung ken o tem benokogo aser bushisüngdang südar, ta SP-isa ashi. Tripura nungi mozü shibeleneritemji Joyel Das, Mohan Mazumdar, Gaurav Gupta, Karnajit Sarkar, Sujit Sarkar, Sanjit Sarkar aser Haridas Sarkar nunger ta jangjaogo. Meghalaya Chief Minister Conrad K Sangma-ia mozü shibeleneritem apuba atema tenüngsang agütsüogo.

Israel-i Jenin refugee camp amakba sülen Palestine nunger trok buba süogo

Ramallah, Aami/June 20 (Agencies): Hombarnü Israel mitkar temi occupied West Bank north tsütsü Jenin yimti meita aoba sülen Palestine nunger nisung trok buba süogo, kong tanur ka densema Palestine nunger pongu tepset aser ano nisung 90 dak tema yiruja liasü.

Arishi küm 48 tain Amjad Aref al-Jaas ya Mongulbarnep yiruba zübu agi asü, shiba dak tepok nung injang agi khaa liasü, ta Palestinian health ministry ajanga ashi.

Taküm January 25 nü Jenin refugee camp nung Palestine nunger nisung ter tepsetba rongnung Ajmad jabaso arishi küm 22 tain Waseem densema liasü.

Ano Hombar aonung Israel sepaitemi southern occupied West Bank kübok Bethlehem anasa Husan anasa arishi küm 20 tain Palestine nunger Zakariya al-Zaaloul tepseta Hombarnü nungi tenzükä

Palestine nunger asür nisung tenet jungogo.

Al-Zaaloul asüpila sentong Mongulbarnep Beit Jala public hospital nungi agiyonga Husan nung aliba leper nung tembanga yangji arem.

Hombarnep Israel sepaitemi Jenin refugee camp telungi aita injang, stun grenades aser toxic gas khaloktsü, ta Wafa news agency ajanga ashi. Palestinian fighters aser Israel army tsüngta ghonda aika khatapba sülen tang mezüngbuba combat helicopters amshia liasü.

Hombarnü amakba nung asürtem ya arishi küm 15 tain Ahmed Saqr, arishi küm 19 tain Ahmed Daraghmeh, arishi küm 21 tain Khaled Darwish, arishi küm 19 tain Qassam Sariya aser arishi küm 29 tain Qassam Faisal Abu Sirriya alitsü, ta health ministry ajanga ashi.

Yirur aliba Palestine nunger 22 kangasa sashia yirur lir aser item rongnung arishi küm 15 tain tetsür ka densema lir.

Hombarnü Jenin nung Israel sepaitemi medical crews daka tenük yoka liasü. Palestine Red Crescent Society (PRCS) nung media and information officer Nibal Farsakh-i ashiba agi, Israel sepaitemi injang khaloktsüba mapang ambulance pezü nung khashi.

Parnoki indang-indanga injang khaloktsüba mapang ambulance tem raksatsü, ta Farsakh-i ashi.

Medical team ya mezüngbo lendong atalokba tesemi arutsü memela aser tatem nung menur arua yirur alirtem yaria liasü.

Iba mapang par sepaitemi tenet yiru, ta Israel mitkar temi ashi.

2023 küm tenzükä Israel sepaitemi Palestine nungi nisung 170 shi tepsetogo aser item rongnung tanur 26 dena lir, ta Palestinian health ministry ajanga ashir. Asürtem rongnung Palestine nunger 36 Israel army temi May 9 aser 13 tsüngta Gaza Strip amakdang asü.

Afghan Taliban-i yimjak nung tasüba temerenshi agütsü

Kabul, Aami/June 20 (Agencies): Nisung tepsetba ken o nung aija alir nisung ka Mongulbarnü mosque ka kima khaset, ta kettangsür temi ashi, koba 2021 küm August ita Taliban telok tanaben yimsüsüba mendeni arur yimjak nung tasüba temerenshi agütsüba tanabuba alitsü.

"Pa ya Laghman province tiyonglen Sultan Ghazi Baba jila nung yimjak nung tasüba temerenshi agütsü, kechiaser ibaji ajanga pa tim atemtsü aser dangartem asoshi tansütsü akumtsü," ta provincial information officers sangdong ka ajanga ashi.

Taliban-i 1996 nungi 2001 tashi mezüng yimsü asüba mapangbo yimjak nung tasüba temerenshi agütsüba ya teti ajurua liasü, saka parnok tanaben yimsüsüba mendeni arur ka dang liasü aser ibaji taoba küm December ita Farah province nung liasü.

Auyaba, nüktabangtaba aser yi ajemba densema danga mapa tamajung inyakba atema yimjak

nung süng agi azükbabo teti ataloker.

Kettangsür temi nisung tepsetsang/aibelensang ya "Naseem'er jabaso Ajmal" ta ashi aser pai nisung pongu tepset.

Provincial information and cultural department nung kettangsür kati osangbener dang ashiba agi, Ajmal-i tepseter kinungertem densema nisung 2,000 jungnüai pa tepsetba repranga liasü aser sharia law agi melaba ama inyak, ta ashi.

Afghanistan indang Supreme Leader Hibatullah Akhunzadai obendanger tem dang 'qisas' temerenshi densema sharia nung mela aliba ajak amshitsü taoba küm totuyuba agüja liasü. Qisas temerenshi ya 'tenük melen tenük' den sako lir.

"Asür kinunger temi tatok magütsüba sülen mapa tamajung inyaksang tepsetba ni angu. Ni aibelener ka mesüra pa dak trok ben akha. Ni pa asü-masü mereprang saka mapang tatsüka lir ambulance nung bener ao," ta Mongulbarnü tepsetba tenük kuli alir kati

osangbener dang ashi.

Ajmal ya AK-47 agi khaset saka pai tepsetba kinungertem masü executioner kati inyak, ta provincial kettangsür kati ashi.

Farah nung December ita tasüba temerenshi agütsüdang tebu par jabaso tepsetsang dak injang khaloktsü.

Ajmal ken o nung lenmang ajak bushidangogo aser tasüba temerenshi agütsütsü teletetba ya Supreme Leader-i agi, ta Afghanistan indang Supreme Court ajanga sangdong ka nung ashi.

"Supreme Leader ajanga kanga junga research agiogo aser shisashir telok den jembia liasü. Ajisüaka tatem nung nisung tepseter nem qisas temerenshi agütsütsü mela aser qisas inyaksü tuyu," ta sangdong ajanga ashi.

Ajmal yagi nisung pongu tesem balala nung tepseta liasü. Laghman province nung ki ka nung pai nisung pezü khaset aser ano danga tesem ka nung nisung ka tepset, ta ashi saka iba ya kodang atalokar mejangja.

Office of the
Chuchuyimpang Senso Mungdang
TENÜNGSANG TETUSHI AGÜTSÜR

Chuchuyimpang Senso Mungdang aser Rionsanger Putu Tatar Menden-i Sensosanger ajak tenüng nung Wb. Repatemsü Jamir aser Wt. Mereninla lmsong, tena jabaso **Dr. Alemmoa R Jamir**, Bidhan Chandra Krishi Vishwavidyalaya; West Bengal nungi, topic entitled "Evaluation of genotypes and response of organic nutrient sources on Coriander (*Coriandrum sativum L*)" under Department of Plantation Spices, Medicinal and Aromatic Crops, nung Doctor of Philosophy (Horticulture) jenjang ajanzüküteta takok tulu ngutetba asoshi tepela tetushi agütsür.



Tarutsü aliba anogotem nunga ne wadang ajak nung Tsüngremi maneni dang azükarua len aniangma ta sensosangertem sarasademtsür.

Sd/-
Wb. Temsumoa
Chairman
Chuhcuyimpang Senso Mungdang

Sd/-
Wb. Nukshimoo
Tir

MULUNGNEN O

Temeim obala Asür **Wb. Kidongchujang Pongen** (Aliba Village), shirangba anogo nungi tasüba anogo 15th June, 2023 tashi kija kibong, lokti balala kwi kati rongsen, shisatsü aser sarasadem agi yaritepogo, nenok ajak den kinungertem tepela lemsateper.



Nenok Kija taküm shia tenüng tetshia mamshiba asoshi sasaa bilemer saka asen Teyanglur Tsüngremi nenok taküm tali dang moajangma ta ozü sarasadem.

Temeim Kinungsü, Chirnur aser Semchirtem.

OFFICE OF THE
LIROYIM VILLAGE COUNCIL
PO.Changtongya BPO: Liroyim Dist Mokokchung
Nagaland-798613

PELABA LEMSATEPER

Onok Liroyim nung alir yimertem mapang talangka Electricity peria menguteti timtema aliba mapang ka **Shri. NIHOLU AYEMI**, OSD Government of Nagaland, pa ajanga acha-ayanga Electricity Power tulu aketba Transformer yimertem ajak peria agitetsüsa bener arutsüba asoshi pelar, ano iba den külemi onok Liroyim Community Hall mapang talangka mernemteti aliba pai rongsen tulu tenla agüja iba ki renemtetogo, pa mapa tajung den tenla tulu asoshi ozü Liroyim council aser yimertem ajaki pelaba sangdonger. Tsüngremi na aser nür kibong asen Naga nungertem ajak asoshi maneni moajangma.

Sd/-
Lidemsangba
Chairman
Liroyim Village Council

Sd/-
Bendangonen
Secretary
Liroyim Village Council

Ukraine nung prangbong hadir yanglutsü atema sensaksemdar: Minister

Kyiv, Aami/June 20 (Agencies): Ukraine nung drone densema prangbong injang aser raradang amshiba hadir balala yanglutsü atema anüolen aliba linüktem nungi sensaksemdar, ta Ukraine nunger minister kati Reuters dang ashi.

Russia-i taoba küm nungi Ukraine amak tenzükba sülen parnok injang nungi tenzükä rocket launchers aser missiles tem agi kanga anünga arudar. Ukraine nem United States, Germany aser Britain amala linüktemi teyari agütsüdar aser Ukraine indang Strategic Industries deputy minister Sergiy Boyev-i ashiba agi, Ukraine nung prangbong injang balala yanglutsü atema Kyiv-i

tang Germany, Italy, France aser Europe anütöken aliba linüktem den sensaksemdar.

"Onoki parnok den kanga junga sensaksemdar aser taruba ita ishika tsüngda tenanzüktepba nung sign asütsü ta temulung lema bilemer," ta Boyev-i Reuters dang Paris Airshow nung shilem agiba mapang shia liasü.

May ita Ukraine Tir Volodomyr Zelenskiy-i ashiba agi, tank nungi artillery tashi yanglutsü aser yanglushitsü atema Ukraine nung base ka amenoktsü atema Kyiv-i British defence company BAE Systems den inyaktepar.

Ajisüaka tang tashi nung tenanzüktepba kecha yanglua mali.

(Maneni tapak 8 nung...)



Ukraine nung Zaporizhzhia anasa Rozumivka nung Russia nungeri injang-bomb tesashi khaloktsüba sülen trucks teraksa anasa ali pokteta adoka aliba noksa nung angur.

Mkg. nung 1st SYU Open Futsal Tournament kadagi



Salangtem Youth Union-i (SYU) ayongzükba 1st SYU Open Futsal Tournament tanü Assistant Director Supply, Dept. of Food & Civil Supplies Mokochung Wb. Jamonger-i tenzüksüba sentong nung asayartem den salem süa ajurutepdang tangokba noksa.

Mokokchung, Aami/June 20(TYO):Salangtem Youth Union-i (SYU) ayongzükba 1st SYU Open Futsal Tournament tanü Mojabi Turf Mokochung nung Mokochung District Football Association (MDFA) akhum kübok "Focus to Endure" ta asüba omen nung ajemdaker tenzükogo.

Tanü iba tournament tenzükba sentong nung tetushi tejaoker Assistant Director Supply, Dept. of Food & Civil Supplies Mokochung Wb. Jamonger-i jembidang Mokochung nung Futsal Tournament ayongzükba akaba ya kanga dang nungdaka aliba tournament ka lir, Mokochung-ji tesangwa akaba, telinütsü aliba, tenükshitsü aliba town ka kuma ajungkettsü asoshi saisapong sentong, kenten menü sentong aser sentong balala achaayanga ayongzükba akatsü kanga

dang nungdaker ta ashi.

Wb. Jamonger-isa saisapong tsütsü olen kar süoka jembidang, Mokochung nung Imkongmeren Sports Complex tia ya ngua kanga dang temulung shiranger, tanur asüdang school tenüing nung Catch Them Young tournament asaya dang akaba ama tang joko kum 40 tema aruaka kasa tia nung lir, Arogo, Yimden aser telok balala ajaki iba ground ya nungdakba mapang nung amshir, saka iba ya anepalutsübo mebiler mesüra meinyaker ta ashi. Paisa alima nung terenlok alitsüla tabo jembir saka meinyaker, anungji jembir telok masü saka teinyaker akümtsüla ta ashi.

Taküm ka lenla ajak nung liro medema litettsü nungdaker, yamaji asayar kati yimya tajung nung timi azüoka asayaba ajanga tetemsü asayar ka

kümtettsü, asayar kati pei nükjidong tongteta takok ngua asayatettsü asoshi Tsüngrem meimtsüla aser Tsüngrem akhümtsübuttsüla ta Wb. Jamonger-isa asayartem ayongzük.

Kasa sentong nung MDFA Tir Wb. Meyisanger Lemtur, Salangtem Ward, Chairman Wb. Lanuakum aser Organising Convenor Wb. Imtisungkum nungeria shilem agia jembiba den Kr. Imlibenla-i ken tajung ka tena sentong lemladaktsüba aser sentong nung Tsüngremer lenisüba jazüka Asso. Pastor MTBA Rev. Temsüwati-i sarasadem aser iba sentong Kr. Temjenjungla ketdangsuba nung agi.

Iba 1st SYU Open Futsal Tournament nung team 31 shilem agidagi aser tanü tenzükba ya June 22 nü tembangtsü.

Ukraine nung prangbong hadir yanglutsü...

(Tapak 7 nungi...)

Germany nungi Rheinmetall-i taoba ita ashiba agi, parnoki Ukraine nung tank yanglutsü aser yanglushitsü atema Ukraine state meyong Ukroboronprom den inyakyim ka amenokogo. Iba inyakyim ya July ita tom nungi tenzükba inyaksangshiyonga aotsü imlar.

"Ukraine-i iba ya nungdaker kechiyong gari raksatoker aser yanglushitsü nungdaker," ta CEO Armin Papperger-i taoba hopta Reuters dang ashi.

Ukraine nung prangbong injang yanglutsü atema bendanger defence firm tem ajungshiba ajanga Kyiv nem parnok nungdakba agütsütsü aser kasa mapang nung alima ajunga nung customer tem dak rangloker parnok indang defence industry tajungba kuma yanglushitsü, koba tang Ukraine nung nem mapa agütsütsü asoshi nungdaka aliba mapang ka nung kanga tongtibang lir.

"Tarutsü nung tsükchirtem nokdangtsü atema Ukraine nung defence industry tashi tait ka aser Ukraine armed force tashi tait ka nungdaker," ta

Boyev-i ashi.

"Anungji international partner tem Ukraine-i arua prangbong injang yangluba aser Ukraine ya parnok indang security framework nung shilem ka kümdaktsütsü ya kanga tongtibang ta bilemer," ta paisa shisem.

Ajisüaka taoba Russia Tir Dmitry Medvedev, shiba Tir Vladimir Putin den kanga junga sendaktepa lir, pai ashiba agi, Rheinmetall-i Ukraine nung kechi facility sa amenokdir aji Russia-i raksatsütsü.

Hombarnü Paris Airshow nung Boyev-i talisa drone yangluba international defence firms tongtibangtem aser company tilatem den ksnga junga ken o ashishitepogo.

"Jenang balala nung teka amteper inyaksü atema onok sensaksemadar aser company karibo drone yanglutsü atema Ukraine-i arua sen intoktsü mulunga aliba lemsatepogo," ta pai ashi.

Turkish defence company Baykar-i taoba kum ashiba agi, Ukraine nung kum ana tsüngda

manufacturing plant ka amenoktsü atema parnok sentong lir.

2022 kum February 24 nü nungi tenzükba Russia-i Ukraine mamak tsüngda Baykar-i Ukraine nung plant ka amenoktsü atema sentong aliba sangdonger liasü.

Ukraine aser Russia na rara nung linük anapronglai drone tem kanga bulua amshidar. Kyiv-i ashiba agi, reconnaissance aser tsükchirtem amaktsü atema parnoki parnok indang drone programme atsilangshiogo.

Turkey, Norway aser United States nungeri Ukraine nem drone tem agütsügo, saka rara tesashiba kuma aoba mapang ka nung drone tali nungdaka kumogo.

Drone yanglutsü atema sensaksema aliba ya mapang talangka agitsü akok, ajisüaka Boyev-i ashiba agi, Ukraine nung drone yangluba ajanga linük nung tang drone yanglua aliba tajungba kümdaktsütsü aser central Ukraine aser antiolen mapa tali adokdaksütsü.

Chirag-Satwik na world No. 3 tarep kümogo

Aami/June 20, 2023 (Agencies): India nunger nungtugu tebur tarep asayar Satwiksairaj Rankireddy aser Chirag Shetty nati Indonesia Open nung mezüingbuba Super 1000 title abenba sülen ranking nung tasembuba jenjangi tuogo. Koba tang tashi nung tenati ajangzükttetba jenjang tajungtiba lir.

Indonesia Open final nung tenati reigning world champions Aaron Chia aser Soh Wooi Yik na straight game nung koka Super 1000 asayamung ka akokba India nunger tarep mezüingbuba aküm.

Satwik aser Chirag na taküm kanga junga asaya arudar aser tenati tang tashi nung Swiss Open kokogo aser Badminton Asia Championships nunga gold medal nguogo.

Tebur kija asaya nung Kidambi Srikanth jenjang asem tejakdangi tua 19buba tongogo aser Lakshya Sen-a jenjang ana tejakdangi tua 18buba nung

lir. HS Prannoy shibai Indonesia Open tebur kija asaya semifinal nung world number one asayar Victor Axelsen mekoki liasü pa maneni 9buba nung lir.

India nunger rongnungisa Priyanshu Rajawat jenjang pezü tejakdangi tua tang 30buba nung lir. Ajak senteper tebur kija asaya nung India nunger asayar pezü top 30 nung lir.

Tetsür kija asaya nung PV Sindhu jenjang ana tejakdangi tua tang 12buba nung lir aser Saina Nehwal-a 31bubai tuogo.

Tetsür tarep asaya nung Treesa Jolly aser Gayatri Gopichand na maneni 16buba nung lir ajisüaka Ashwini Bhat aser Shikha Gautam na 41bubai asepzüka luogo.

Tarep temeyoktep asaya nung Rohan Kapoor aser Sikki Reddy na jenjang ana tejakdangi tua tang 33buba nung lir aser Tanisha Crasto o Ishan Bhatnagar na jenjang ka asepzüka lua tang 38buba nung lir.

Anett Kontaveit Wimbledon sülen asaya nungi anentsü



Aami/June 20, 2023 (Agencies): Estonia tsür tennis asayar Anett Kontaveit (27) teberem nung timtem aliba ajanga asaya nungi anentsü atema telemtetba agiba sangdongogo.

Kontaveit shibai taoba kum world ranking nung tanabuba jenjang tonga asayaago, lai ashiba agi, la taruba ita Wimbledon nung tatembangsa asayatsü.

Teberem yiruba ajanga Kontaveit-i 2022 kum October ita masayatsü atema telemtetba agi. Iba sülen temang anepalutsü atema lai ano February nung ita ana masayatsü telemtetba agia liasü. Ajisüaka la teberem tajungba makümba ajanga professional tennis asaya nungi anentsü atema telemtetba agiogo.

"Doctor den aiben ajurutepba den kü medical team den ken o ashishitepba sülen parnoki kü teberem nung lumbar disc degeneration lir ta ashi," ta

lai Mongolbarnü Instagram nung zülutsü.

"Iba ajanga ni training mesüra tetoktepa balala nung shilem agitsü memelar. Anungji ni iba amala tetoktepa kanga sashia aliba temaba jenjang nung maneni masayatettsü. Ni Wimbledon nung tatembangbuba asayaba sülen taküm nung jenjang tasen agitsü renema lir," ta Kontaveit-i ashi.

La tang jenjang 79buba nung lir aser la Australian Open nung tanabuba round nung tsükatok. La May ita French Open nunga mezüingbuba round nung tsüka liasü.

Kontaveit-i, 2020 kum Melbourne Park nung quarter final tonga asayaago koba la asoshi Grand Slam nung tajungtiba asayaba liasü. Estonia tsür la yagi 2021 kum kanga junga asaya-a asayamung pezü akok aser WTA Finals tongteta liasü aser ibayongji la taoba kum September ita tanabuba jenjangi tua liasü.

BILEMDANGANG

"Tetsükdaktsü ajangshiba ajanga nisung ka shisa ka kümdaktsür."